

優等獎

關渡秋行四詠

林勇志

關渡自然公園彈塗魚

平生行跡伴江湖，草澤雲天喜寄軀；鰭泛晚潮知進退，眼窺秋葦了榮枯。
波瀾世路原藏險，丘壑襟懷不覺孤；濮水應曾聞傲吏，而今曳尾樂彈塗。

見兒童餵食孤雁

長風萬里雁來賓，憔悴孤行頗損神；何慕鶴翔高振翼，可嘲雞唱苦司晨。
童心相惜還投食，吾意獨憐難拔身；俗餌勸君休戀棧，雲蹤從此便蒙塵。

候鳥棲地

關渡迢遙路幾千，招邀羽客落翩翩；翎梳風色煙波淨，影舞秋光雲水妍。
高臥江山心不改，閒棲池沼境猶遷；何愁變幻人間世，此地依然多謫仙。

獨自觀夕

浮生佳境此淹留，獨賞落暉誰可儔；寒渚日斜孤客影，明霞雁喚一川秋。
殘雲風捲東西散，餘歲江催晝夜流；來去委心還自在，縱然行踣也遨遊。

作者介紹

林勇志，目前擔任教師，課餘喜歡從事寫作，曾獲得教育部文藝創作獎、玉山文學獎等。

評審意見／顏崑陽

這四首作品以「關渡秋行」所見所感為主題，確實具有臺北在地經驗與現代感。前三首書寫「自然公園彈塗魚」、「兒童餵食孤雁」、「候鳥棲地」，是詠物之體；第四首則變而以「獨自觀夕」之抒情詩收結，卻不妨其為組詩結構。四首詩都造語明暢，幾無瑕疵；而意象清新，時有精警佳句。最為可貴者，詠物而能隱涵比興寄託之意，往往虛實相生，言內實寫物態而言外虛寓人情；故能意境深闊，引人沉思，允屬難得之佳構。